




鰲峰集

AO
FENG
JI

中

(明) 徐燊 著
陳慶元 陳煒 編著

廣陵書社

國家古籍整理出版專項經費資助項目
江蘇省「十二五」重點出版規劃項目
復旦大學中國古代文學研究中心項目

鼇峰集

(明)徐燧 著
陳慶元 陳煒 編著

中

廣陵書社



黿峰集卷之十四

七言律詩

丙申元日客武林

浮生踪跡嘆漂零，又見春回一葉荳。尊酒共誰孤館醉，笙歌不比故園聽。梅花無賴當窗白，柳色何知向客青。旅夢易醒腸易斷，曉鶯啼罷雨冥冥。

春日同鄭翰卿西湖晚望因懷同社諸子

三竺鐘聲過嶺微，六橋烟柳晚依依。月明湖北僧初定，春到江南客未歸。遊子獨尋青草路，故園空鎖白雲扉。相知回首三千里，目斷關河淚滿衣。

贈陸履素使君

元是清河幾葉孫，千秋詞賦擅中原。名高漢署薪猶積，訟簡公庭草自繁。結客有車遷幸舍，尋

僧留帶鎮山門。觀潮挾得三千弩，射却蛟龍不敢喧。

錢塘江口別翰卿

遊子春來戀釣磯，馬頭南望去騑騑。愁心暗逐蘼蕪長，遠夢潛隨柳絮飛。百囀流鶯空喚友，一聲杜宇又催歸。故鄉人在他鄉別，不比尋常淚濕衣。

春日出武林寄曹以新王百谷文夢珠彭興祖沈穉咸沈從先諸君

渺渺寒江送客舟，離情空寄水東流。淚垂燈火雲邊路，魂斷笙歌月下樓。吳苑荒臺麋鹿走，越山春樹鷓鴣愁。中宵不作錢塘夢，只在百花洲上遊。

雪夜泊釣臺

舟泊嚴光舊釣磯，半江寒色上征衣。斷橋野草和烟冷，獨樹梨花捲雪飛。客恨憶家春轉急，旅魂尋路夜能歸。浮生自厭塵勞苦，何日於陵早息機。

潑水驛道中

鄉心日夜不曾停，故國天邊望杳冥。冰解漸流春澗碧，雪消微露晚山青。遠村芳草迢迢路，古驛垂楊短短亭。滿目春風簫鼓沸，天涯孤客斷腸聽。

思歸

春事催人夢寐驚，杜鵑啼血愴離情。
暝吞野店雲流影，響落孤蓬雪打聲。
客久愁非杯裏釋，夜長詩每枕邊成。
心知此去鄉園近，猶恨關河幾日程。

懷翰卿

殘燈寒漏酒醒時，月落猿啼處處悲。
一夜夢魂孤枕識，半生心事蒯緱知。
少年若箇能輕薄，中歲何人愛別離。
漂泊江湖俱未了，山林誰訂白雲期。

到家

不盡淒涼久客情，還家偏喜及春明。
飢寒隔歲憐妻子，漂泊經年訴弟兄。
殘雨落花新戲蝶，東風垂柳又啼鶯。
晝眠幽竹山窗下，夢裏猶驚繫馬聲。

分得洞庭霜送陳伯孺之吳門

震澤風高起夜涼，木奴千樹盡含霜。
未秋先綴枝枝綠，斜日爭垂顆顆黃。
落處金丸難辨色，剖來瓊液自生香。
袖中莫忘懷三箇，堂上慈親待陸郎。

再送伯孺

千里西吳一騎輕，君行應是我歸程。孤身漂泊辭知己，八口饑寒仗友生。繞澗松篁天竺路，滿湖菱芡下孤城。旅游到處羞貧賤，好向人前諱姓名。

送余宗漢之南康

幾人垂老愛馳驅，白髮憐君尚畏途。馬首寒光携劍匣^{〔一〕}，鳥邊雲氣辨香爐。他鄉作客黃金盡，故國談詩白社孤。此去莫耽彭澤酒，遙天日日待雙鳬。

送張叔弢廣文之官瓊州

傳經萬里類投荒，渡海身隨貝客航。水怪驚殘天外夢，嶺猿啼斷月中腸。三秋瘴雨檳榔綠，滿路蠻烟橘柚黃。莫道廣文官獨冷，一瓊今去是炎方。

贈屠田叔轉運

聲華自昔重西京，南國初傳賁沛名。禮典太常陪漢祀，詩追正始主齊盟。爲官海內稱冰蘖，客盤中出水晶。公子門多天下士，敢勞虛左待侯生。

二月十九送了空禪師還金陵是日爲觀音大士降誕

空門去住本無期，却爲慈悲感別離。了悟真僧行脚日，圓通菩薩化身時。波心斷葦浮千頃，瓶裏新楊贈一枝。歸到高臺重說法，半天花落雨參差。

懷吳元翰

流落天涯獨問津，何門堪寄病中身。半宵有淚孤燈泣，四海無家一劍貧。失路悲歌誰結客，窮途生計且依人。他鄉我亦漂零久，今日思君倍損神。

寄長樂郁文叔令君

銅章新佩始爲郎，萬樹桃花一縣香。結客不辭分月俸，救荒偏許薄秋糧。天邊雙鳥看鳧影，海畔重樓起蜃光。感激年來王粲座，後生容得欄衡狂。

賦得飛燕有贈

不戀烏衣舊宅春，翩翩空繞畫梁塵。獨眠樓上差池羽，妙舞宮中宛轉身。營壘却携金剪去，啣泥初化寶釵新。也知孤影無棲處，肯向朱門覓主人。

邀黃仲高張孺愿錢叔達張公魯及同社諸子集萬歲寺因送徐仲和還錢塘

未向長亭折柳條，看花猶且憩僧寮。人天佛日空門靜，瘴雨炎風去路遙。馳道青驄蘇小墓，騰江白馬子胥潮。與君不是無期別，醉後離魂也盡銷。

送曹能始之撫州吊周令君

何事征衣滿淚痕，傷離嘆逝兩銷魂。半生永抱孤琴痛，千里空酬一劍恩。古道悲風奔白馬，新墳愁雨哭清猿。此情不似羊曇淺，醉裏含哀叩寢門。

送陳女翔遊龍虎山

方外尋真謁紫冥，芒屨踏遍曉峰青。樂聞鳳管千聲沸，符請龍泥一道靈。行炁洞中吞夜月，步罡壇上禮秋星。朝回變盡人間服，集得仙家白鶴翎。

賦得金山寺送客之維揚

層層塔影漾中流，古寺鐘殘暮靄收。蒼鶻搏風分上下，巨鼇聞呪半沉浮。隔江月照瓊花夜，遠岸潮喧鐵甕秋。杯酒墳前澆郭璞，片帆乘浪過瓜州。

同屠田叔張孺愿張公魯錢叔達集陳正夫水亭分得狂字

使君千騎下東方，乞假相携問辟疆。月裏金尊絲管咽，風前銀燭綺羅香。王猷看竹尋芳徑，山簡迷花入醉鄉。驚座不成鸚鵡賦，當筵羞學少年狂。

送張孺愿之漳州

客身漂泊瘴雲東，歷遍閩天路欲窮。暑雨鳴鳩榕葉外，夕陽羸馬橘花中。數間野店林陰合，一片孤城海色空。銷盡旅愁山市酒，綠尊時對荔枝紅。

送張公魯

越客東行不暫停，孤城遙指海溟溟。窮村勒馬登途倦，罽市烹魚入饌腥。山鬼叫殘林月黑，畚人耕破瘴雲青。鷓鴣聲裏思鄉切，腸斷輶軒未慣聽。

寄謝在杭司理

蒼弁山前碧浪南，白雲署外水拖藍。庭間每見茶烟起，官冷全憑酒味甘。支得月糧惟養鶴，徵來夏稅半收蠶。公餘倒屣延詞客，名理時時握麈談。

送洗明府歸南海

蕭蕭白髮路行難，曾是河陽一宰官。別鶴調琴歌單父，無魚彈鋏嘆馮驩。堤邊楊柳重來折，縣裏桃花再度看。歸去羊城尋舊隱，瘴江風雨老漁竿。

寄張成叔

何處思君別恨生，分携猶記闔閭城。三年霜露麻衣淚，千里烟霞綰帶情。寄遠久虛蘭杜信，哀吟應廢蓼莪聲。書郵莫訝封題重，緘得愁心到四明。

懷伯孺客吳

故人踪跡隔吳閭，目斷遙天足練長。楊柳影深迷苧澤，芰荷香暖滯寒塘。鐫鏤帶血尋空巷，響屨無聲感舊廊。懷古知君情最切，題詩墓上吊真娘。

送鄭震卿之錢塘尋兄

漂泊辭家黯斷魂，情深長念鵲鴿原。秋風短褐千行淚，夜雨孤燈十載言。湖上殘荷天竺寺，路傍衰柳武林門。此行莫令南飛雁，先爾雙雙到故園。

送人之蒼梧

一身南去入蒼梧，聽得蠻音處處殊。翡翠曉寒巢灌木，蚺蛇春暖曬平蕪。古祠舊淚枯斑竹，廢井香魂怨綠珠。四月火山丹荔熟，輕紅能似故園無。

七夕鄧汝高計部招同余宗漢謝修之明府鄧道鳴閩帥錢叔達山人陳汝大王粹夫

文學陳幼孺孝廉康元龍袁無競茂才惟和家兄集玉皇閣得珠字

帝座溟濛近可呼，拍肩同到太清都。天孫佳會停雙杼，地主留驩送百壺。烏鵲正填橋上路，驪龍誰得掌中珠。憑闌忽聽金風起，剪斷疏林一葉梧。

初秋鄧道鳴將軍招集鄰霄臺席上送鄧汝高計部督餉還朝

青山面面擁高牙，載酒邀賓坐紫霞。明月金鑣秋一曲，微霜砧杵夜千家。呼盧暫借行軍令，惜別難攀奉使槎。他日登高重望遠，五雲西北是京華。

中秋夜邀張孺愿錢叔達謝修之曾波臣陳汝大俞青父袁無競集攬黿亭觀萬歲神

光二塔燈分得七虞

永夜嬋娟瑩玉壺，半天金粟落浮圖。千花舍利空中相，百寶牟尼藏裏珠。清影並輝忘色界，慧

光雙照悟迷途。蓮花漏盡從生滅，還有山河大地無。

送張孺愿歸明州

海國秋高雁獨征，西風吹動故鄉情。歌殘柳岸紅亭酒，散盡芝山白社盟。野店寒星低馬首，關門涼月引鷄聲。茫茫此夕思君夢，長伴飛雲過四明。

送黃仲高孝廉還四明

紅亭綠酒醉黃花，客子逢秋倍憶家。海上迦山皈佛日，嶺頭關路出仙霞。驛樓古樹寒嘶馬，野店衰楊晚噪鴉。此地懷人空一水，滿天涼露灑蒹葭。

送閔壽卿山人隱武夷

出家休用買山錢，方外尋真住洞天。芒屨竹筇修淨福，藥爐茶竈結清緣。一竿春雨桃花水，雙屐秋峰薜荔烟。玉笥班中新注籍，幔亭寧但十三仙。

奏罷遊仙一曲歌，方袍桐帽入雲窩。竹溪夜泛風吹笛，芝圃朝耕雪滿蓑。峰頂采真呼玉女，洞中行氣引黃婆。碧窗覓我留題處，半壁殘詩翳古蘿。

寄曹重甫

遠夢頻飛柳水流，愁聞鶴唳一聲秋。懷人空望雲間路，乘興難移雪下舟。七步文章推子建，八行書札重曹丘。明年共醉秦淮酒，夜夜春風十四樓。

喜吳元翰遠歸過訪

何處歸來道路長，匆匆下馬說他鄉。故衣未換征人淚，往事空迴遠客腸。夜月愁心歌舊雨，秋風衰鬢染新霜。去年此日黃花酒，玉女峰頭醉石床。

花燭詩爲林子真賦

玄露同擎碧玉卮，鳳簫樓上數聲吹。桃花錦帳郎君面，楊柳青銅少女眉。文甲夜通犀點點，珊瑚春並枕枝枝。彥先一代傳雙壁，乞得機雲贈婦詩。

張叔麟別駕招集鍾山客舍席上觀妓共得香字

新詞迴雪繞空梁，引鳳簫聲墜馬妝。銀燭滿屏延夜漏，玉簪敲竹蹋春陽。裙翻月照蓮花冷，佩解風傳荳蔻香。不用琵琶訴幽恨，座中先斷使君腸。

和幼孺無題

恨倚蒹葭玉一枝，暗中虛度破瓜期。劍分雷煥歸何日，鏡剖徐郎合未知。五十斷弦愁錦瑟，一雙條脫繫羅帷。世間自少昆崙使，那有今生得見時。

酬屠田叔使君見贈

公庭如水靜無譁，問字人來便放衙。寒夜青燈編海錯，中春白雪煮鹽花。逢僧不離譚心性，薦士何嘗惜齒牙。總爲冷曹堪吏隱，時時騎馬到烟霞。

題爲親乞祿卷贈丁文統少府

詞賦登壇重子虛，一官瀕海嘆居諸。承歡祇愛嬉萊彩〔二〕，捧檄寧辭領簿書。仙吏操同冰自潔，老親頭比雪何如。潘郎滿縣桃花發，日日春風御板輿。

題胡生遺像胡曾與余同學

愁絕芳魂去渺茫，夜臺誰逐少年場。丹青重傳何郎粉，黃土空埋荀令香。玉折庭前終莫續，珠沉海底永無光。迴思風雨寒窗日，舊事傷心十五霜。

〔一〕 菜刻本、鈔本俱作「菜」，據詩意改。

無題

燭乾誰令死灰然，顧影淒涼轉自憐。薄命故添中夜淚，有情當續後生緣。擘開蓮子從來苦，剖破菱花不再圓。簾外蕭蕭寒食雨，香魂無主怨芳年。

死別吞聲去杳然，千秋埋玉一人憐。返魂重見元無術，托夢相逢不是緣。鏡裏青山眉黛缺，枕前紅雨淚珠圓。白楊滿地誰爲掃，枉住人間十九年。

送鄧將軍之東粵

車騎如雪鼓角鳴〔一〕，南荒萬里仗干城。劍光夜夜冷霜侵塞，弓影秋高月照營。槎上葡萄通漢使，笛中楊柳咽蠻兵。一時名將推詞客，露布千言倚馬城。

虞美人草

離離原上舞東風，却似悲歌玉帳中〔三〕。夜雨香魂空化碧，夕陽恨血尚留紅。新痕有意生淮水，淺黛何心鎖沛宮。一自笛聲吹散後，更無愁色渡江東。

〔一〕 雪鈔本作「雲」。

〔二〕 玉刻本模糊，據鈔本補。

丙申除夕

辛盤將進換神茶〔二〕，又見韶華此夕徂。失意自悲城上雀，浮生真類隙中駒。客催畫債寬新歲，舖索書錢急舊逋。猶憶去年殘雪裏，探梅騎馬過西湖。

丁酉元日

年長羞將甲子推，雄心差減少年時。栢傳春色杯中葉，梅送香魂雪後枝。佳惡詩文元自得，疏狂情態更誰知。床頭三尺華陰鐵，一片寒光夜陸離。

送彭興祖還吳

歷遍閩天一歲中，歸裝仍似到來空。烏啼村樹鞦韆響，馬踏山花躑躅紅。短刺虛將當路謁，長途偏爲故交窮。從今踪跡過湖海，莫信諸侯禮士風。

分得邀笛步送陳淳夫之金陵

蘆花秋水白茫茫，溪上停舟憶野王。蒼玉半枝枯蜀管，綠苔千古翳胡床。參差律呂清宵月，長短關山獨夜霜。不用送君歌折柳，曲中三弄倍思鄉。

〔一〕茶 刻本、鈔本俱作「茶」，據詩意改。

送凌元孚博士之官北雍

王事匆匆不暫停，傷離空望短長亭。度關寒食沾衣雨，投驛黃昏拂劍星。楊柳青旗燕市酒，桃花絳帳馬融經。一官莫嘆羶猶冷，東觀聲名滿漢廷。

黃全之先生八十初度

八十年過貌返童，商山重見夏黃公。青牛出谷關常紫，白虎窺爐火自紅。任俠尚餘燕趙氣，談詩寧作宋齊風。四朝全盛留遺逸，鶴髮江潭一釣翁。

送張叔麟別駕還溫州

蕭蕭衰鬢獨還家，故國雲山夢永嘉。一曲清歌攀柳色，千秋白社散蓮花。夕陽古驛驅羸馬，暮雨孤村宿亂鴉。自愧臨岐何所贈，雌雄雙劍報張華。

送陳志玄太學還中都

海國春殘杜宇悲，王孫芳草念歸期。飛花逐馬紅千點，垂柳藏鶯綠萬絲。客路風烟辭劍浦，故山雲樹望鍾離。斷腸最是天南北，夢隔長江兩不知。